



BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
GRAD SARAJEVO
OPĆINA CENTAR SARAJEVO
OPĆINSKI NAČELNIK

P R A V I L N I K

**O RASPODJELI NOVČANIH SREDSTAVA ZA DODJELU JEDNOKRATNE
NOVČANE POMOĆI LICIMA KOJIMA JE U VRIJEME TRAJANJA STANJA
PRIRODNE ILI DRUGE NESREĆE PRESTAO RADNI ODNOS**

Maj, 2020. godine

Na osnovu člana 15. stav 1. tačka 2. Zakona o principima lokalne samouprave u Federaciji Bosne i Hercegovine ("Službene novine Federacije BiH " broj 49/06 i 51/09), člana 25. Statuta Općine Centar Sarajevo i Odluke o izvršenju Budžeta Općine Centar Sarajevo za tekuću godinu, Općinski Načelnik donosi

PRAVILNIK

O RASPODJELI NOVČANIH SREDSTAVA ZA DODJELU JEDNOKRATNE NOVČANE POMOĆI LICIMA KOJIMA JE U VRIJEME TRAJANJA STANJA PRIRODNE ILI DRUGE NESREĆE PRESTAO RADNI ODNOS

Član 1.

Ovim Pravilnikom uređuju se kriteriji i način dodjele jednokratne novčane pomoći (u daljem tekstu: jednokratna pomoć) licima kojima je u vrijeme trajanja stanja prirodne ili druge nesreće prestao radni odnos.

Član 2.

(1) Cilj pružanja novčane pomoći je ublažavanje stanja socijalne potrebe prouzrokovane prestankom radnog odnosa.

(2) Socijalnom potrebom u smislu zakona smatra se trajno ili privremeno stanje u kome se nalazi određeno lice ili porodica, prouzrokovano ratnim događajima, elementarnim nesrećama, opštom ekonomskom krizom, psihofizičkim stanjem pojedinaca ili drugih razloga, koji se ne mogu otkloniti bez pomoći drugih lica.

Član 3.

(1) Sredstva sa budžetske pozicije predviđena za ove namjene dodjeljuju se na osnovu Javnog poziva koji se objavljuje na web stranici Općine i ostaje otvoren 30 dana nakon prestanka proglašenog stanja prirodne ili druge nesreće ili do utroška planiranih sredstava.

(2) Jednokratna pomoć utvrđena ovim Pravilnikom dodjeljivat će se na osnovu podnesenih zahtjeva, a u skladu sa objavljenim javnim pozivom.

(3) Zahtjevi za ostvarivanje prava na jednokratnu pomoć podnose se Službi za boračko-invalidsku, socijalnu zaštitu i društvene djelatnosti- Odsjek za socijalnu zaštitu (u daljem tekstu: Službi) putem protokola Općine.

(4) Zahtjevi će se rješavati po redoslijedu podnošenja.

(5) Služba je dužna u roku od 30 dana od dana podnošenja riješiti zahtjev i o tome obavijestiti podnosioca.

Član 4.

Uvjeti za ostvarivanje prava utvrđenog ovim Pravilnikom su :

- a) da podnosilac zahtjeva na dan proglašenja stanja prirodne ili druge nesreće ima prebivalište na području općine Centar Sarajevo;
- b) da je podnosiocu zahtjeva utvrđen prestanak radnog odnosa za vrijeme trajanja prirodne ili druge nesreće;
- c) da primanja porodičnog domaćinstva ne prelaze iznos prosječne plaće ostvarene u FBiH u mjesecu prije proglašenja stanja prirodne ili druge nesreće (950,00 KM);
- d) da se podnosilac zahtjeva nalazi na evidenciji nezaposlenih lica;
- e) da podnosilac zahtjeva nije ostvario drugi vid jednokratne novčane pomoći iz nadležnosti Službe za boračko-invalidsku, socijalnu zaštitu i društvene djelatnosti.

Član 5.

- (1) Visina jednokratne pomoći isplaćuje se u iznosu od 30% prosječne plaće ostvarene u FBiH u mjesecu prije proglašenja stanja prirodne ili druge nesreće i iznosi 285,00 KM.
- (2) Pravo se ostvaruje jednom u toku kalendarske godine.
- (3) Izuzetno od stava (2) ovog člana, ukoliko Služba nakon provedenih postupaka po javnom pozivu utvrdi da nisu utrošena sva sredstva predviđena za ove namjene, jednokratna pomoć može se dodijeliti i drugi put aplikantima kod kojih je utvrđen veći stepen socijalne potrebe u odnosu na druge (primanja domaćinstva, broj članova domaćinstva i sl.) pod uvjetom da se i dalje nalaze na evidenciji nezaposlenih lica.

Član 6.

Uz zahtjev za dodjelu jednokratne pomoći podnosioci su dužni dostaviti sljedeću dokumentaciju:

- uvjerenje o kretanju za podnosioca zahtjeva;
- prijava prebivališta za podnosioca zahtjeva;
- kućna lista;
- dokaz da je radni odnos prestao za vrijeme trajanja stanja prirodne ili druge nesreće (rješenje, odluka ili drugi pravni akt poslodavca);
- uvjerenje da se podnosilac zahtjeva nalazi na evidenciji nezaposlenih lica;
- tekući račun podnosioca zahtjeva.

Član 7.

- (1) Ukoliko se nakon provedenog postupka utvrdi da lice ispunjava uvjete za ostvarivanje prava Služba će prijedlog i mišljenje uputiti Općinskom načelniku koji donosi Zaključak o dodjeli jednokratne pomoći.
- (2) Služba će uz svaki prijedlog za dodjelu jednokratne pomoći, Općinskom načelniku predočiti iznos preostalih sredstava za ove namjene, kako bi se obezbjedilo ravnomjerno trošenje sredstava tokom budžetske godine.
- (3) Isplata jednokratne novčane pomoći licima vršit će se putem Službe za privredu, finansije i ler uplatom na tekući račun korisnika usluga.

Član 8.

Ovaj Pravilnik stupa na snagu prvog narednog dana od dana objavljivanja na Oglasnoj ploči, a naknadno će biti objavljen u „Službenim novinama Kantona Sarajevo“.

Broj: 09/3-11-2320/20
Sarajevo: 12.05.2020. godine.



Napomena: Pravilnik je objavljen na oglasnoj ploči Općine Centar Sarajevo dana 12.05. 2020. godine

O b r a z l o ž e n j e

I- PRAVNI OSNOV

Pravni osnov za donošenje ovog Pravilnika sadržan je u odredbama člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09) i čl. 25. i 69. Statuta Općine Centar Sarajevo – prečišćen tekst ("Službene novine Kantona Sarajevo", broj: 23/04)

II- RAZLOZI ZA DONOŠENJE

Proglašenjem stanja prirodne ili druge nesreće na području Bosne i Hercegovine dana 17.03.2020 godine uslijed pandemije koju je izazvao virus COVID-19 i naredbi koje je izdao Federalni štab civilne zaštite zabranjeno je obavljanje određenih djelatnosti što je rezultiralo velikim brojem prestanaka radnih odnosa i dovelo do stanja socijalne potrebe mnoga domaćinstva.

Uvažavajući činjenicu da je ugrožena egzistencija mnogih lica a u cilju ublažavanja posljedica izazvanih stanjem prirodne ili druge nesreće pristupilo se izradi ovog Pravilnika.

III-PRIJEDLOG PRAVNIH RJEŠENJA

- **Član 1.** definiše predmet regulisanja Pravilnika;
- **Član 2.** definiše cilj Pravilnika, te definiše pojam socijalne potrebe;
- **Član 3.** propisuje obavezu objavljivanja javnog poziva te definiše procedure i rok rješavanja zahtjeva;
- **Član 4.** normira pod kojim uvjetima se može ostvariti pravo utvrđeno Pravilnikom;
- **Član 5.** normira visinu pomoći te izuzetak od jednokratne dodjele;
- **Član 6.** definiše dokumentaciju koja se podnosi uz zahtjev;
- **Član 7.** definiše način isplate;
- **Član 8.** utvrđen je način stupanja na snagu ovog Pravilnika.

III- FINANSIJSKA SREDSTVA

Za donošenje ovog Pravilnika obezbjeđuju se finansijska sredstva u budžetu Općine Centar.